

Gweddi Byw'n Syml

Dduw trugarog a chariadus,
creaist y byd i ni oll ei rannu, byd o harddwch a digonedd.
Crea ynom ddyhead i fyw'n syml,
fel y gall ein bywydau adlewyrchu dy haelioni.

Dduw'r Creawdwr, rhoddaist i ni gyfrifoldeb dros y ddaear, byd llawn cyfoeth a hyfrydwch.
Crea ynom ni ddyhead i fyw mewn modd cynaliadwy, fel y gall y rhai a fydd yn ein dilyn fwynhau
ffrwythau dy gread.

Dduw heddwch a chyfiawnder, rwyt yn rhoi i ni'r gallu i newid, i sefydlu byd sy'n adlewyrchu dy
ddoethineb dithau. Crea ynom ni'r awydd i weithredu ynghyd, fel y dymchwelir colofnau
anghyfiawnder ac y rhyddheir y rhai y mae gormes yn eu llethu heddiw.

Amen.

Troedia'n dyner

Mae pob deilen, pob petal,
pob gronyn, pob bod dynol,
yn dy glodfori,
Dduw'r Creawdwr.

Mae pob creadur yn y byd,
yr holl fynyddoedd a'r moroedd mawrion,
yn cyhoeddi dy ogoniant,
ysbryd cariad.

Ac eto
mae crafanc trachwant
wedi atafaelu ac anrheithio
dy ysblander,
wedi meddiannu dy roddion
a heb eu rhannu,
wedi ymhonni'n berchennog ar y ddaear,
yn lle byw fel gwestai yma.

Ac felly,
mae'r rhew yn teneuo,
mae afonydd yn sychu,
mae llifogydd yn llyncu'r dyffrynnoedd,
a'r eira'n diflannu o'r copaon.

Dduw ein Tad, dangos inni
sut i droedio'n dyner,
sut i fyw'n syml,
gan barchu a charu
popeth a wnaethost.

Amen

*Cydnabyddiaeth: Linda Jones, CAFOD
Cyfieithwyd i'r Gymraeg gan Siôn Aled Owen.*

Mae Byw'n Syml yn ymgyrch gan CAFOD i hybu byw cynaliadwy mewn cymunedau eglwysig. Gellir gweld manylion pellach [yma](#).